

QUÆSTIO MEDICA.
 QUODLIBETARIIS DISPUTATIONIBUS
 MANE DISCUTIENDA
 IN SCHOLIS MEDICORUM.

Die Jovis 10 Februarii 1718.

M. FRANCISCO AFFORTY,

ANTIQUO FACULTATIS DECANO,

DOCTORE MEDICO, PRÆSIDE.

*An in homine amarum, falsum, acidum, dulce, quibus valet
 & ægrotat?*

I.

SAPIENTIS est Medici hominis constitutionem explorare; principia ex quibus componitur non ignorare; signorum tam salubrium, quam insalubrium discrimina distinguere; morborum causas, eorumque symptomata complecti; curationem per indicationes instituire: Sed quis ille sapiens hæc certò tutòque præstare valeat, nisi qui sanguineæ molis compagem, ejusque crasim meliùs intellexerit? Illam pituita, & bilis utraque, flava scilicet & nigra (quam melancholicæ nomine designant,) hanc efficiunt amarum, falsum, acidum, dulce, proximæ sanitatis & morbi causæ. Sic edoctus observat quomodò singula se habeant ad hominem comparata; quid in homine facere possint; quomodò cognationes ineant inter se; quomodò & quando fiant affectiones; unde augeant ac definant: Quas autem per totum vitæ decursum experimur, sanitatem & morbum, variosque ab alterutro recessus, ac repetitos ad alterutrum reditus, neque à calore, neque à frigore, neque à siccitate, neque ab humiditate, quæ Medicinæ proprium non sunt fundamentum, nec hominem lædunt, proficisci fatendum est; sed ab iis quæ insunt homini, amaro, falso, acido, dulci, cæterisque potentiis, quibus tum copiâ, tum facultate inter se tem-

Ex Hypo-
 crate, lib. de
 veteri Medi-
 cina.

Ex Hypo-
 crate, lib. de
 Natura Hu-
 manæ.

peratis, & maximè permixtis, valet homo: Si quid horum secretum fuerit, minus aut amplius, neque à reliquis temperatum, ægrotat.

I I.

SANITATIS & morbi causas, non ad primas qualitates elementares tantoperè decantatas, non ad occultas, nec ad totius substantiæ modum ac proprietatem; sed ad amarum, salsum, acidum, dulce, referendas esse statuimus: adeò verum est immunes esse à morbis solum eos, quos amari, falsi, acidi, acris, vis insolita non exercuerit: Si, verbi gratià, in febribus pugnandum esset contrà calorem, aliasve ejusmodi qualitates, Medicus sapiens extinguendis etiam malignis, & intermittentibus profligandis, remedia non adhiberet calida, sicca, amara, qualia sunt Cortex Peruvianus, Cortex Ferulæ, Radices vel Flores Centaurii Minoris, & similia: Nonne acida Cardialgiæ, Malaciæ, Scorbuto? acerba & austera Lienteriæ, Dysenteriæ, Mensium, Hæmorrhoidum, aut alio gravi profluvio? falsa & acria, præsertim ea quæ plurimo sale volatili referta sunt, soporosis affectibus, tanquam specifica, medentur. Quid plura, si alterantia vel purgantia? Medicamenta agerent vi ac energiâ istarum qualitatum, cur alia similibus donata qualitatibus, nec idem, nec eodem modo præstare valent? Ex naturali igitur amari, falsi, acidi, dulcis, legitimè fœderatorum mixturâ fit sanitas; ab inæquali prædominio, & ab invicem secretionē, morbus.

I I I.

NON solum viventibus, sed mixtis omnibus, amarum, salsum, acidum, dulce, austerum, aut acerbum inesse voluit Natura, quibus diversam alterandi, purgandi, & agendi facultatem indidit: Unum quodque vegetans etiam in seipsum trahit è terrâ his gravidâ succis, sibi ipsi juxtâ naturam magis familiarem; hinc fit ut in Polypodii radice austerus sapor cum dulci percipiatur; in Glycerhisâ dulcis cum acerbis; in Scordii Foliis acerbis cum amaro; in Myrrhida, Fœniculo, & Anisi semine, acer cum dulci; in Brassicâ acer cum amaro; in Aceto acidus cum acris; in Vino dulcis cum acido; in Absynthio amarus cum austero. Idem ferendum est judicium de Rhabarbaro, de Cortice Peruviano, de Ipecacuanhæ radice, & aliis Vegetantium generibus, quæ vi propriâ sibi quæ peculiari, ad determinatos quosdam effectus sunt comparata. Ex Cibis pariter ingestis, qui commodi sunt & incommodi, horum unusquisque aut amarus est, aut salsum, aut acidus, aut dulcis, aut austerus vel acerbis: hisdem Humores præditi sunt saporibus; Sanguis propriè dictus dulcis est; Bilis flava, amara 3 nigra, acida; acida Saliva; serum Salsum; Pituita ut plurimum insipida. Ex Sanguinis distillatione, principiorum & saporum in eo existentium fidem faciunt experimenta quàm plurima.

Ex libro
Boylei, de
apparatu ad
Historiam
naturalem sanguinis humani.

QUANDIU cuique humori suus à naturâ inginitus remanet sapor, tandiū valet homo ; tantū verò ægrotat, quantum discedit & immutatur ab eo qualis primū fuerat ; ut quò major extiterit mutatio, eò pejor ægritudo : Inde tot diversæ affectuum genera, quot alterationes diversæ ; quibus etiam non parū confert, ut dissimilis vivendi, sic ægrotandi ratio. Medicus porrò sapiens instare debet prout unumquodque horum in corpore prævalet : Ex amatore diffuso, quales statim anxietates, & æstus, & impotentia occupant ; quales viscerum ac pectoris morsus : Ex salsedine præsertim acri, Raucedines, Anginae, Erysipelata, Peripneumoniae : Ex aciditate, quā plurimū inficitur sanguinis compages, Cachexia, & affectus prope modū infiniti, qui ab insigni sanguinis acore frequentius produciuntur ; vix enim credibile est quantum acidum habeat in humoribus imperium, & quot immaturum invehat symptomata : Sanguine nimium dissoluto, sulphureisque particulis, unā cum spiritibus quasi in furias actis, ex falso volatili acri dominante, accenduntur præcordia ; Phreneticus furor Ægrum de lecto sternit, vel stratum, aut in eo jacentem immitis succutit Convulsio, sive ipsi affinis inordinatus artuum motus : factū verò crassiore ex Salso acido exuperante, cordis Palpitatione succidit, & animi Deliquio fatiscit ; tuncque serosa Illuvies à sanguine crassescente libera, sui que juris facta, vel insolitos agit curriculos errans sinuoso tramite ; vel quoquoversum prodiga diffuens, atrocissimos Arthritidis, Rheumatismi, Colique cruciatus invehit, vel per vasa lymphatica, per nervos, ad cerebrum refuga, laborantis caput impedit, metuendoque non satis veterno symptomatum pessimo statim obruit, arque intercepto spirituum comœatu, si non interficit Apoplexiā, afficit Paralyti.

V.

NE MINI mirum esse debet, si quot sunt in humoribus saporum alteratorum modi, tot sint in Ægrotantibus morborum atque symptomatum genera diversa ; alia enim est alteratio & alterationis malignitas in Lue Venereā, alia in Dysenteria, alia in Morbillis ac Variolis, alia in Scorbuto, alia in Febribus Purpuratis, sive Petechialibus, alia in Contagiosis sive Pestilentialibus, alia in Continuis sive Intermittentibus ; quin & symptomata non eadem sæviunt in omnibus. Ille gravanti membrorum lassitudine torquetur : Hic pungenti Colico, lumborumque cruciatu incurvatur : Alter subito capitis dolore corripitur : Alter horrore laceffente convellitur : Multi violento vomendi conatu quasi animam eructant ; plures præfocanti anhelatione vix ducunt spiritum ; non pauci cruento è naribus, è pulmone, ex alvo, ex utero, immerguntur effluvio : Alii etiam coacti, vel inscii, frequenti ac pestiferā sordium cadaverosè fetentium ex ventre dejectione confuscantur ; atque hi sunt effectus, quos amarum, salsum, aut acidum malè moratum explicat ; cujus etiam vitium hauritur sæpe cum potu,

deglutitur cum cibo, inspiratur cum aere, sensimque in ventriculum, in sanguinem, in præcordia intrusum, incautos circumvenit, & nullâ habitâ personarum acceptione, suas exerit vires: Sed unde præcavenda tot affectuum atque symptomatum accessio, expectanda solutio? Si concitatori motu ferantur humores, partesque amaræ ac sulphureæ dominatum habeant, compescunt remedia ex acidorum classe deprompta; si nimium torpeant, & acido vincente constringantur, excitant Volatilia, Diaphoretica, Theriacalia, Bezoartica, & similia, non omisiss (cùm opus est) vacuantibus: Hac arte proximè futurum ex imminente saporum vitio malum antevertitur; insultum emendatur; ne grassetur latius, eradicatur; sic torpenti sanguini motus additur; nimis effervescenti detrahitur; intemperato crasis restituitur.

*Ergo in homine amarum, salsum, acidum, dulce,
quibus valet & ægrotat.*

DOMINI DOCTORES DISPUTATURI,

M. Petrus Azevedo.

M. Franciscus Aignan.

M. Urbanus Leaulté.

M. Joannes Herment,
utriusque Aula Equæstris
Medicus Ordinarius.

M. Jacobus Fourneau.

M. Franciscus Pecoté de
Belestre.

M. Stephanus - Franciscus
Geoffroy, Regia Scientia-
rum Academia Parisien-
sis, Regiaque Societatis
Londinensis Socius, &
Regius Professor.

M. Michael-Ludovicus Re-
neume de la Garenne,
Regia Scientiarum Aca-
demia Socius.

M. Joannes Daval.

Proponebat Parisiis CLAUDIUS DE LA VIGNE DE FRECHEVILLE,
Parisiensis, Baccalaureus Medicus, A. R. S. H. 1718.
à sexta ad meridiem.

Typis J. QUILLAU, Universitatis & Facultatis Medicinæ
Typographi.